

san sabanan - nimèrò 28
zuwèn kalo - san 1974

bp 24
bamakò
mall

dòromè 4 - CCP : 0155

Kibaru

a bò mali kibarudiso ka yamaruya kònò

zuwèn kalo tile 2, san 1974 malidenw ka
kantigiya n'u ka mögòbèrèya donna sariyaba
kura sigi cogo la jamanadenw fè.

mali bëna taa sariya kuraw kan

awirili kalo tile 23 san 1974, an ka
jamana peresidan, n'o ye kolonèli
musa tarawele ye, a ye kuma ta ar-
jo mali la, k'a fò malidenw ye ko
an ka jamana sariyaw bëna yèlèma,
mali sariyaba bëna kë kura ye, ha-
damadenya ni hèrè ni badenya ni
dannaya kònò.

peresidan musa tarawele y'a fò ko
wote bëna kë sariyaba kura in kan,
zuwèn kalo tile 2, a y'a jira ko fa-



soden bëe ka kan k'u janiya jira
sariyaba kura in kan, n'a bë taa u
jimin sira fè, walima n'a tè taa a fè,
u k'o fò.

kabini kolonèli musa tarawele ku-
ma don, fo ka n'a bila bi la, kòmite
militèri mögòw donna jamana kònò,
ka taa kunnafoniw di malidenw ma
sariyaba kura taabolow kan.

(a tò bë nyè 3 la)



zuluye kalo tile 6, f'a tile 14

mali denmisènw ka dògòkun nyènajèba

nyinan, mali denmisènw ka sanfi-
la dògòkunyènajèba bë daminè ba-
makò, kalo kura tile 6, fo ka taa a
bila a tile 14 na.

denmisèn 115 de bë bò jamana ma-
ra kelen kelen bëe kònò, k'i kunsin
bamakò ma. o bë bèn denmisèn 690
de ma, nyèmögòw sen t'o la.

nyènajè in sen fè, jana dama dama
de bë tòmò, k'u kunkòròta, k'u la-
diya k'a da u ka baara nyuman kan,
min nyèsinnen bë mali ka nyèttaa
ma, kòtèba, dònkili, dòn, fòli ani
nyènajè caman sira kan.

i n'a fò san tòw cogo, an bë dugaw

kè walasa nyinan ta ka diya kosèbè,
k'a mögòw nimisi wasa, k'u jigi tugu,
k'u nyèw n'u tulow daamu.

amadu ganyi kantè



ja kùnbèn cogo

bëe y'a dòn ko ja y'an ka
jamana labò, fèn don, a ma
cun an kan, a nana dòoni dòoni,
taamashiyèn dòw fè : a bë
san caman bò bi, ji ma na a
cogo kòrò la, walima a ma da-
bila a waati la, walima a ma
caya samiyè kònò.

ja nin dun lajuguyabagaw ye
anw yèrè de ye. cogo di ?

an ka kungow kònò, jiri kè-
nèw de bë tigè sisan, k'a ja,
k'a kë dògò feereta ye. siw bë
tigè, nèrèw bë tigè, jiri kènèw
bëe bë tigè, k'olu ja, k'u ton
siradaw la feereli kama.

wajibi la, ni jiri tè jamana
kònò, tile fanga bë bonya, kòw
ani baw bë ja, sanji bë dògò-
ya, a na cogo bë yèlèma. n'an
ma hakili sòrò jiriw lakanani
na, an ka jamana bë lanko-
lonya, fo an sigi cogo bë gè-
lèya a kònò. daramani sise

bole :

denmisèn mara yòrò

bi, dutigi caman b'i makasi n'u
denw ka joko juguya ye. u b'a fò :
"n'ye n'se ko bëe kë, nka o si ma
yèlèma don a ka kow la. o tuma,
n'bë taa a bila bole" i n'a fò, sua
wèrè bë bole kònò, min bë kabako
kè den lamò konyuman na, ka coo-
low kè den sabatilen ye.

denw ka joko juguya ju bë jòn
na ?

mìri kèra, kòlsili kèra, k'a fò, o
joko juguyaw ju bë den faw ni den
bow de la, bawo bëe b'a dòn ko den
(a tò bë nyè 3 la)

hakililasèbènni: balikukalan

mògò dònbalì t'i dòn,
balikukalan !
mògò caman nyè b'i la, olu t'i dòn.
mògò minw bè se k'i kalan,
olu ma i dòn ka se i dan ma.

zèrènijè, jatigi faga jiri,
i wulitò filè nasara sèbènni ju fè,
i ko mininyan donso.
i natò bè, i n'a fò mininyan donso,
i bèn fèn tè tugun.

e de y'anw bò kalanbaliya dibi la,
k'an ka yèrèta saniya.
sababu man dògò.
i kanu y'anw ka sòrò yiriwa.
i y'an kisi asetèri juguw tòordò ma,
k'an dèmè, an ka nafa sòrò an fa dugukolo la.
kalan ni sèbènni ni jatew bée bè kè
en yèrèw ka kan na.
sini,
i na kè malidenw ka baarakèminèn fòld ye.

ala ka fèn bò mògò la, min ka fisà i yèrè ye.
kibaru bòra i la, ka tògò sòrò, ka danbe sòrò,
ka dawula sòrò, ka sanga sòrò,
ka medayi yèrè sòrò.
ala ka i den balo i ye.

amedi tijani
baginda

ntolatan

ntolatanba min sigilen bè afiriki jamana ntolatan tòn-baw kelen kelen ni nyògòn cè, n'a bè fò a ma "kupudafirikidékilobu", o siratigè la, mali ntolatan tòn gana min tògò ye joliba, o ni nizeriya ntolatan tòn gana ye nyògòn kunbèn taanikasegin na.


ntola kun fòld gosira bamakò. o diyara an na, bawo an ka janaw ye nizeriya janaw gosi bi 2 ani 0. an ka biw donbagaw kèra mamadu sidibe ye, n'a bè fò a ma dekosèri, ani mamadu kònè, n'o bè wele zito.

ntola in tan ko filanan kèra nizeriya faamadugu la, n'o ye lègòsi ye. nizeriya bëndèli, n'o y'u ka jamana ntolatan tònba ye, o sera mali joliba la. u y'an ka janaw ci ni bi 1 ani 0.

ni jateminè kèra, an b'a dòn ko joliba ka bi donta ka ca ni nizeriyakaw ta ye. o de kama, an ka janaw bè nyògòndan in na hali bi. o tuma, an bè dugaw kè joliba ye, u k'u cèsiri karatata, walasa k'an kunnawolo. malidenw bée jigi b'u kan.

basidiki ture

shèmara



sulu wòordò bè shèso kelen kònò. shèden sèrè fòld min bè mara, o shèden kelenkelen si, na tuma si tè dògòkun bò. o sèrè bè dògòkun fila sòrò yòrò min na, an bè sèrè wèrè nyini, sèrè min shèdenw tè dògòkun bò.

sèrè filanan shèdenw bè bila u danma sulu kònò, ka gun sèrè fòld sulu la. o sèrè filanan shèdenw mana dògòkun fila sòrò, o tuma bëna kè sèrè sabanan nali ye. sèrè nata o nata shèden si man kan ka dògòkun bò, u na tuma.

o sèrè fèn o fèn bè na, o bée bée bila a danma sulu kònò, ka tugu nyètaw la.

sulu wòordònan shèdenw na don, o b'a sòrò, sèrè fòld shèdenw ye dògòkun tan sòrò. o waati ye olu feere tuma ye. sèrè wòordònan shèdenw bè dògòkun fila sòrò yòrò min, o ka kan k'a sòrò, sèrè fòld shèw feerela ka ban. o tuma, sèrè wolonwułanan shèdenw bè na. olu na cogo ni tèmènnèn na cogo bée ka kan. o tuma b'a sòrò, sèrè filanan shèw ye dògòkun tan ye.

suleyimani mènta

shè sèrèw	:	sulu								
fòld	:	2n	:	3n	:	4n	:	5n	:	6n
shèdenw	:	0	:	0	:	0	:	0	:	0
dògòkun	:	2	:	0	:	2	:	0	:	2
shèdenw	:	4	:	2	:	0	:	0	:	0
dògòkun	:	6	:	4	:	2	:	0	:	0
shèdenw	:	8	:	6	:	4	:	2	:	0
dògòkun	:	10	:	8	:	6	:	4	:	0
shèdenw	:		:	10	:	8	:	6	:	2
dògòkun	:		:		:	10	:	8	:	4
shèdenw	:		:		:		:	6	:	2
dògòkun	:		:		:		:		:	4
shèdenw	:		:		:		:		:	

jabini shèw tè dògòkun kelen bò, fo u dògòkun tgn

kòròshiyènni

mògò ma bònè a ka warì la, f'e mògò min ye nògòdon ni furakèli kè, k'a sòrò i m'i ka foro kòròshiyèn.

o tuma, a ye fòld kòròshiyènni na, n'aw b'a fè aw ka nafa sòrò aw ka forow la.

mali bèna taa sariya kuraw kan bamakò mara

o siratigè la, kunnafoni jèkulu dò nyèmògòya dira kumandan filifèn ma, a ka don bamakò ereziyòn kònò, a ni jama ka jèkafò kè sariyaba kura kan. filifèn ka taama sen fè, a y'a jira fasodenw na ko sòrðasìw tèna foyi bila jamana ka hèrè nyè.

kayi mara

kumandan kisima dukara tun bè kayi kunnafoni jèkulu nyèfè. a ka taama kònò, a y'a fò a kumanayògònw ye ko rewolisiyòn sìdònbali dò ye malidenw ka yèrèmàhòrònya lagosi waati min, jamanadenw bée jigi tigèra. a ko ni ala sònna, faso jugu si tèna se ka mali kè a yèrè sago ye.

sikaso mara

kunnafoni jèkulu min taara sikaso n'a kafow kònò, kumandan zozèfu mara de tun b'o nyèfè. a ni jama ye nyògòn kumanayògònya. zozèfu mara ka kòrðòkan kònò, a y'a nyini jamanadenw k'u bolo di nyògòn ma, ka jè ka kè kelen ye ka faso baara, k'a d'a kan, an ka nafa bè o de la.

segu mara

segu n'a kafow kònò, kumandan karimu danbele n'a ndèmògòw fana y'u se ko bée kè. karimu danbele ka kòrðòkanw kònò, a ye wele bila fasoden nyumanw bée ma, u bée ka wote zuwèn kalo tile 2 fasò ka nyètta sabatili sira kan.

moti mara

kunnafoni jèkulu min donna moti n'a maraw kònò, o nyèmògòya dira kumandan misa kònè ma. misa kònè ka jèmukanw sen fè, a y'a jira ko malidenw ka kelenya sabatili hèrè ni lafiya kònò, o dulonnen bè òwò de la, zuwèn kalo tile 2.

gawo mara

kumandan mamadu sanogo min tun bè gawo kunnafoni jèkulu nyèfè, o ko fasodenw ma, ko òwò fòli u fè, zuwèn kalo tile 2, o de bèna mali ka yèrèmàhòrònya yèrèyèrè sabati farafinna kònò.

min ye bamakò dugu kònòna yèrè ye, kumandan baba jara ani kumanan yusufu taraweles, olu kumana bamakòkaw ye sariyaba in n'a kònò kow kan.

nyèmògò ninw ka taama ma kè sanjikòrò wòsi ye, bawo, wotè don, malidenw ka kantigiya n'u ka mògòbèrèya dònnna sariyaba kura in sigi cogo la jamanadenw fè, faso

kònò an'a kòkan. ni ye jamakuluw tila kèmè kèmè ye yòrò o yòrò, i b'a sòrò bikòndòntòni ani kò de woter "owo". kuma tè min kò, o de ye nin ye. sisan sa, ala ka hakili nyuman di jamana nyèmògòwn'a denw bée ma, cèw ani musow, walasa an ta ka kè an yèrè ye, an ka bò nògòla.

basidiki ture ani amadu ganyi kante

bole:denmisèn mara yòrò

ye bògò kènè dè ye, den ka kan ka ladon konyuman, n'an t'a fè a ka coolocoooloya, n'an t'a fè a ka sonyèli kè. nin jogu juguw mana nyògòn sòrò den na ka ban, k'u diya a ye, o den marali bè gèlèya kosèbè.

o sababu kòsòn, bole bè den ta ka nyèsin baarakalan ma, bawo a ka lakòli bée kèra ni coolocooololi ye. den mana don bole, a masaw ka

kan tuma bée k'u dungò don a la n'a sira taamali ye. o bè kè sababu ye k'a jira den na ko nyinè ma kè a kò, ko a somògò ma a lafili. a b'a dèmè ka hakili sòrò, walima ka hakili nyuman d'a ma.

an k'a to an hakili la k'an ka kan k'an jan to an denw na, an k'u tangga coolocooololi ma, minw bè kè sababu ye k'u kè kò fè mògòw ye.

den bè don bole hukumu jumèn kònò?

kòlòsili bolofara

denmisèn minw bè don bole, olu si bè san 13 ni san 18 cè.

den fa walima a lamòbaga bè lètèrè sèbèn, ka faranfasiyali kè, dalilu minw kòsòn a b'a fè ka den bila bole.

den wolosèbèn fana bè nyini, ani den ka lakòlidèn sèbèn, min b'a jira k'a tun bè lakòli la. olu bée bè fara nyògòn kan, ka ci denmisèn ka kiritigèla ma, walima afèrisosiyali ka kuntigiba ma, bamakò.

ladamuni bolofara

ni den kòlòsira kalo saba walima kalo wòorò, sèbèn dafalen dò bè ci a ka kètaw kan, denmisèn ka kiritigèla ma. o fana bè jateminè kè ni ladamuni karamògò ka sèbèn kònò kow ye, walasa ka denmisèn in nyèsin wale ma, min b'a nafa. o bè se ka kè a toli ye a ka denbaya kònò, walima a marali ye bole.

waati min bè kè ladamuni kè yòrò

an ka yèlè dòoni

nin ye cè dò ye, a tògò ye nyama sangare, ka bò murujan. don dò kèra, ale taara yaala dugu kònò, fo ka dumunikè waati tèmèn, ale ma na. ale nalen tuma min na, ale ma kuma a ka du kònò mògò si fè. muso ni denw tora masala la ten sa.

waati sera, muso y'i kan to a denw ma : è, denw, nka kalo jèlen bè su in na. sangarekè y'i kan to a muso ma : o dò wèrè bò i da kònò nin kò. n'i ye o dò wèrè bò i da kònò, ne bè taa, i n'i denw ka to tò ta, k'a dun sisan sisan.

aw bée k'a dòn, sangare ye kòrdò juga belebele ye.

salifu buwarè ngalamajankòrò.



mali jiginèba



faso jiginèba sigira, desanburu kalo tile 4 san 1959 la, sariya fè, min nimòrò ye : 59-29 filanan, n'o y'a kè faso jiginè ye nyòw ni malow ka sira fè, fo ka taa a bila jiridenw ni nakò kònò fènw na.


opamu ye foroba baarada ye, n'o sirilen tè mògò wèrè la a ka nafolo baara sira kan. baarada in ka wale nyèsinnen bè jago ma, min ye balow ni jiridenw ni nakò kònò fènw sanni n'u feereli ye, an'u jirali sugu wèrèw la. ale de bë nyò, ani malo, ani kaba, ani alikama feere, fo ka taa a bila balo tòw bée la, ani jiridenw, ani nakò kònò fènw, minw bè sènè mali kònò.



wele ko "ènsipèkitèrè"

sènèfènw feereli jamana kònò, an'a kòkan, o konyè bée bë opamu bolo.

opamu ye cikèlaw jigi ye, waati bée, aw bë se ka nyò ni malo sòrò opamu na, sòngò la, min ka nògòn. cikèlaw minw b'u ka sènèfènw feere opamu ma, o cikèlaw b'u ka sini nyèsigi. bawò, opamu ye misiba jabali ye, bée ka kan min nòndò la.



opamu, aw bée b'a dòn, k'o ye faso jiginèba ye.
a ka baara nyèsinnen bè sènèfènw sanni an'u feereli
siratigè ma. sènèfènw fana bë feere sèriwusi fè opamu
ka hukumu kònò, n'o sèriwusida bë wele ko koperatiwu.
faso jiginèba, n'o ye opamu ye, o sèriwusida sigilen
bë bamakò. nka, jamana mara yòrò wòdorò kelenkelen
bée la, opamu ka mògò sugandilen bë sòrò yen, n'a bë

wari de bë vari ladon

izini nyèmògòw, jagokèlaw, gòfè-
rèheman ka baaradaw, ani kenyèrè-
yew, n'aw b'a fè aw ka sannifènw
ka dòn u mangutun fè, a ye wuli ka
se kibaru dìla yòrò la joona : mali
kibarudila yòrò minisiriso, bp 24,
bamakò, mali.

ni aw bolofènw mangutun fòra ki-
baru kònò, o y'aw tilalen ye, bawò,
nyè tugu n'a yèlèn, a bée bë san k'a
ban.

kibaru mana fèn o fèn mangutun
fò, a kalangbagaw n'a kanubagaw bë
da o de la.

TRANSPORT

ye doniw ta yòrò ye mali kònò an'a kòkan, bolifèn suguya bée la.
a kuntigiba n'a kow nyènabòla ye

daramani jawara

bamakò: bp. 753	telékisi 532	telefoni 243.18
		ani 226.89
transimport bolofara bë :		
abijan	segue	bobò
bp. 2034	bp. 140	bp. 244
tel. 32.22.42	tel. 183	tel. 96.77
		tel. 125
sikaso lome		
		bp. 107 bp. 2313
		tel. 100